

PAULO LIWAKATETIGI GAALATATEDI

Galácia one iigo aneledi oiige romaanotedi. Oneliodi lapoli loiigi Cristo mijoataga owidi nigotadi Galácia. Liwigotigi nigicoa nigotadi, ani aca Antioquia da Pisídia, Derbe, Listra, ajaa Icônio. (Awinteloco Atos 15). Eliodi oko ane loiigi Goniotagodi aona judeutedi, pida onica judeutedi anoditioigi me daga dibatetege Aneotedogoji nige dogodioteci ijoatawece ane lakataga judeutedi.

Paulo gonitiadi lotaga me dakapetege nigicoa niigaxinaganegeco ane degewiteda, codaa yalomege nigidi oko anodioteci nigicoa niigaxinaganegeco ane digica ane jaogate. Codaa yalagata Abraão, ane nelokodi judeutedi, anodaagee me nakato Aneotedogoji, odaa leegodi eliwagatakanegegi Abraão, odaa Aneotedogoji ja dibatetege. Abraão akaagijo me yewiga maleedigicatibige Moisés daga iditedini liigenatakanegeco Aneotedogoji codaa ane lakataga judeutedi. Paulo mee nigina oko anonakato Goniotagodi me dagadiaa liotagi nigijoa lakataga laxokodi judeutedi. Paulo aagaga yalagata niginoa ane loenataka nigina oko anodioteci laalegena lidagataka ane beyagi, codaa aagaga yalagata anigota Aneotedogoji Liwigo nigina oko baanogonakato Goniotagodi.

Paulo yecoaditibige ica nigeladimigipitigi niigotedi Galácia

1 ¹Ee, Paulo, jidi nagadi iwakate notaganagaxi. Ee liigexegi Jesus Cristo, codaa me Aneotedogoji Godiodi, aneote Jesus me yewigatace nigijo me yeleo. Agoko anetidiolaticce, codaa agoko anetidiige me jibatema Aneotedogoji. ²Ee inaa inatawece gonioxoadipi aninaa digoina meetaga godecoaditibige lapoli loiigi Aneotedogoji ane ligeladi niigotedi Galácia. ³Jemaanaga Aneotedogoji, Godiodi, codaa me Goniotagodi Jesus Cristo midioka limedi meliodi mowote aneletagadomi, codaa mowote gadaalegenali mele. ⁴Jesus ijaa dinajigo me yeletetema gobeyacegeco, eote me godiwoko nakataga ane beyagi aninoa nigina iigo. Leegodi joanigidaa ane yemaa Aneotedogoji Godiodi. ⁵Odaa jemaanaga nigina oko midioka limedi modogetetalo Aneotedogoji. Odaa jigidaagee. (Amém.)

Agicoa eletidi nibodicetedi anele ane icogotedicogi miniwataga Aneotedogoji, pida jiginkinoateda niginoa ane jatematiigatedibece

⁶Gadopootiwaji nigica me age mikanitedice Aneotedogoji aneniditedagawa. Leegodi Cristo eliodi meletedagadomitiwaji, odaa Aneotedogoji eniditedagawa

makaami nepilidi. Pida jigiwagatitiwaji eledi natematigo anodi nigina oko me icogotigi miniwataga Aneotedogoji. ⁷Pida anewi, agicoa eletidi nibodicetedi anele ane icogotedicogi miniwataga Aneotedogoji. Pida inatibece oko anetigadigiwocitice, codaa odoletibige moiigi niginoa nibodicetedi anele anoditece Cristo. ⁸Pida degejinagatece eledi natematigo, ogoa domigetaga aanjo ane icogotibigimece ditibigimedi daga eetece natematigo ane daga liciaco nibodicetedi anele baanegejinagatece, Aneotedogoji eote midioka limedi me nawikodeega nigina oko aneetece eledi natematigo, codaa domigokomogoko, ogoa domige aanjo, pida idokee me godiloikatidi. ⁹Ejinagatacagawa nigijo baanegejinagatawawaji. Digica okanicodaagica oko ane yatematitagawawaji eledi natematigo ane daga liciagi nigijo natematigo anele baanaga abaatege, Aneotedogoji iloikatidi nigica oko nigepaa ganigicatibige. ¹⁰Dawice me gadotaganegenitiwaji igaataga ajoletibige me jogaata oko. Pida joletibige me jao Aneotedogoji ane yemaa, oada ninitedibece. Ajoletibige daga jogaata oko, igaataga daga joletibige me jogaata oko, oada agotege liotagi Cristo.

Anodaagee Aneotedogoji me isolatedice Paulo me liigexegi

¹¹Inioxoadipi, jelogoditedagawa niginoa nibodicetedi anele, niginoa ane jatematitedibece, agica aneetege lowooko nigina oko. ¹²Igaataga agoko ane najigotiwa nigida natematigo anele, codaa agica ane idiigaxitece niginoa nibodicetedi anele. Pida Jesus Cristo jiniaaginiwa ane nikeetediwa nigida natematigo.

¹³Nigida makaamitiwaji jagajipaatebece ane yoenataka nigijo malee jioteci lakatigi judeutedi. Eliodi me jiatetibeci Aneotedogoji loiigi, codaa agica daga jiwikode. Inoatawece jaote me domaga jaagadi nigidi noiigi. ¹⁴Owidi eletidi lionekadi ane inagaxatologo me jioteci ane lakatigi yoiigi judeutedi. Codaa eliodi me idinoniciwagadi me jotete liigaxinaganegeco yaamipi.

¹⁵Pida Aneotedogoji idiomagaditedice me ee liigexegi malee idejote catiwedi le eido. Oada leegodi meliodi me idiwikode, jegeniditediwa me jioteece.

¹⁶Aneotedogoji ninitedibece me yakadi me nikeetediwa Lionigi, eotedibige me jatematitedibece nibodicetedi anele anoditece Jesus, liwigotigi eletidi noiigi ane daga judeutedi. Nigijo Aneotedogoji naga nikeetediwa Lionigi, ajoletibige eledi oko degetidiigaxi. ¹⁷Codaa agejigo nigotaga Jerusalém daga jakapetege nigijo oko baanaga liigexedi Aneotedogoji maleedigicatibige meniditediwa. Pida agica daga idinopagadi oada jegejigo nipodigi Arábia, nigidiaagidi ja jopitacicogi nigotaga Damasco. ¹⁸Naga ixomagatedijo itoatadigida nicaagape, oada jegejigo nigotaga Jerusalém, domegejigo joletibige me jowoogodi Pedro. Idiaagejote manitaga nigotaga ciinze nokododi. ¹⁹Pida agica jinadi otiginitece eledi liigexegi Goniotagodi, onijoteci me jinadi nigijo anodita Tiago, nioxoa Goniotagodi.

²⁰Digawinitiwaji! Eji lodoe Aneotedogoji me daga jiwitaka. ²¹Nigijo naga idoditicogi Jerusalém, oada jegejigo nipodaga Síria aniaa Cilícia.

²²Icoa lapoli loiigi Cristo ane ideí nípodigi Judéia anígica degetidowoogodi. ²³Nígidi noiigi idokida mowajipa moditibece, “Nígijo anijo me godiatetibece, natigide jona yatematitedibece nibodicetedi anele anoditece Cristo. Jotigide geme domaga yemaa me yaagadi niginoa nibodicetedi anele.” ²⁴Odaa nigidi noiigi odogetetalo Aneotedogoji leegodi anodaagigotediwa me idiigi.

Paulo idiaageletidi liigexedi Aneotedogoji

2 ¹Naga ixomagatedijo 14 nicaagape, odaa jejejigotace nigotaga Jerusalém ixigagawa Barnabé. Ijaa Titoeledi jadeegi. ²Ejigo Jerusalém leegodi Aneotedogoji nikeetediwa me leeditibige mejigo. Negejoticogi digoida, odaa ijoka jatecogojogotege nigijoa lacilodi loiigi Aneotedogoji. Odaa ja jelogoditioigi ane diitigi ane godatematigo, nigijoa nibodicetedi anele ane jelogoditedibece miditaga noiigi ane daga judeutedi. Ibakedi baanaga jao codaa egidaagejatigi me jao, ajemaa daga atooa nigida ibakedi. ³Tito ixigagawa. Odaa idaagida me loiigi greegotedi, pida agoiedege nigijoa lacilodi me yakagidi lolaadi ane lakatigi judeutedi moikee me nepilidi Aneotedogoji. ⁴Pida idi oko anokowo moyiwagadi Goniotagodi. Nígidi oko codaagidi naga dakatiobece anei me jatecogojogo, domogoyemaa moyowoogodi domigewi dagadiaa jiwagatece ane lakataga judeutedi, codaa domogoyemaa moyowoogodi mige jiigaxinaganagatece me jakataga me jikanaga nigijoa lakataga leegodi me godexogotege Jesus Cristo. Codaa domogoyemaa metigodiedege mejiwagatacece nigijoa lakataga, odaa joanigidaa taga jopilagatacege moko niotagipi nigijoa lakataga. ⁵Pida agodiwoditema, otegeaagaga onatecigica, jaotibige akaamitiwaji midokee makati majipaata, codaa me iwagati nibodicetedi anele anewi.

⁶Odaa idiwa ijoa ane odiniciaceketege nigidiwa godacilodi, pida agica jaote daga jowoogodi ganigidi, igaataga Aneotedogoji aniwitedi oko aiwi ane latopaco oko, pida iwi anee. Agica oko degetidiigaxitece gaantigida gela yowoogo miditaga. ⁷Pida onadi Aneotedogoji naga najigotediwa inagatetigi me jelogoditedibece nibodicetedi anele minataga noiigi ane daga judeutedi, digo mijotaga Pedro me yajigote nagatetigi me yelogoditedibece nibodicetedi anele miditaga judeutedi. ⁸Igaataga Aneotedogoji najigotediwa loniciwaga me ee liigexegi minataga noiigi ane daga judeutedi, digo mijotaga Pedro me yajigote loniciwaga me liigexegi miditaga judeutedi. ⁹Tiago, Pedro ijaa João, anododigota niginaeledi oko micataga daga godacilodi, nigidi iniwatadigini nogoyowoogodi Aneotedogoji me najigotediwa nigida ibakedi gonegegi, odaa jogodibatogogi ee ijaa Barnabé moikee moniwoditogodomi. Okotawece godiwoditema mele me gobakadi liwigotigi noiigi ane daga judeutedi, idigidi бага libakadi miditaga judeutedi. ¹⁰Nígidi iniwatadigini liigexedi Goniotagodi idokida monipokotogowa me jaxawanaga niginoa madewetedi anidi liwigotigi Aneotedogoji loiigi digoida nigotaga Jerusalém. Joanigidaa me idinoniciwagataga me jaogate anonipokotogowa.

Paulo diojotece Pedro manitaga nigotaga Antioquia

¹¹Nigijjo Pedro migo dalita nigotaga Antioquia, jiojotece lodoe loiigi Aneotedogoji, leegodi me dibatá. ¹²Igaataga nigijjo negeno, ligiiwepoditibece nigijjo anoyiwagadi Goniotagodi ane daga judeutedi. Pida nigijjo negenotibeci nigijjo goneleegiwadi ane niige Tiago, odaa Pedro ja yototicoace nigijjo anoyiwagadi Goniotagodi ane daga judeutedi, odaa agalee ligiiwepodi, igaataga nigino judeutedi aliigiwepodi nigina ane daga judeutedi. Odaa ja dinogatice leegodi doitiogi nigijjo aniedege nigina ane daga judeutedi me leeditibige moyakagidi lolaadi, ane lakatigi judeutedi, moikee me nepilidi Aneotedogoji. ¹³Codaa ijoa eletidi anoyiwagadi Goniotagodi ane judeutedi agaca laalegena, odaa jogowo liciagi Pedro. Codaa me Barnabé owo magaga dioteci anowo. ¹⁴Odaa nigijjo naga jinadi me degewi modioteci naigi anewi icoa nibodicetedi anele, ane icogotibigimece miniwataga Aneotedogoji, odaa mejita Pedro lodoe ijotawece nigijjo oko, “Akaami judeu, pida jigikani me iwitece ane lakataga judeutedi, odaa jigiwitece anodaagee nigina ane daga judeutedi. Enige, igaamee ina memaani me iedegeni ina ane daga judeutedi modioteci ane lakataga judeutedi?”

Aneotedogoji icota meote me newigatace judeutedi, inaagina ane daga judeutedi, leegodi monakato Jesus

¹⁵Me janiigatini nogoko noiigi judeutedi, Aneotedogoji ane iomagaditedice, agica anejinagatege eledi noiigi ane digicoateda miditaga liigenatakanegeco Aneotedogoji ane iditedini Moisés. ¹⁶Pida jigidaagee oko judeutedi, jowoogotaga Aneotedogoji me daga yakaditeda oko me igenaga daga leegodi me yotete lajoinaganegeco Moisés, pida leegodi me jinakatonaga Jesus Cristo. Joanigidaa leegodi okomogoko judeutedi me jinakatonaga Jesus Cristo, jaogatibige Aneotedogoji me yakadi me godegenaga leegodi me jinakatonaga Cristo. Agalee joleegatibige Aneotedogoji me yakadi me godegenaga, leegodi me jotetenaga lajoinaganegeco Moisés. Igaataga Aneotedogoji agica ane yakadi me igenaga daga leegodi me yotete lajoinaganegeco Moisés. ¹⁷Nigina me joleegatibige Aneotedogoji me yakadi me godegenaga leegodi me godexogotege Cristo, ja jikeenaga moko abeyacagaga digo minataga nigina ane daga judeutedi. Pida domige nigidaa leegodi, Cristo meote me jaoga ane beyagi? Odaa anigidaagee! ¹⁸Pida micataga nigina oko ane yaagadi ligeladi, odaa nigidiaagidi ja dabitegetacini ijaagijjo nigijjo diimigi. Eote nigijjo aneetini. Joanigidaageji naga jika me joletibige me idegenaga leegodi me jiocece nigijjoa liigenatakanegeco Aneotedogoji, igaataga nigidiwa niigenatakanegeco onikeetaciwa me ee abeyacegegi, codaa Aneotedogoji me daga yakaditeda me idegenaga. Digidiaagidi daga joletacibige Aneotedogoji me yakadi me idegenaga leegodi me jotete liigenatakanegeco Aneotedogoji, odaa ja jikeetace me ee abeyacegegi, me digica ananiigiti. ¹⁹Odaa leegodi nigidiwa niigenatakanegeco monikeetiwa me ee abeyacegegi, odaa micataga degetideloadi nigidiwa niigenatakanegeco.

Odaa agalee joletibige daga yakadi Aneotedogoji me idegenaga leegodi me jotete niigenatakanegeco, codaa agaleegetidiige nigidiwa niigenatakanegeco. Odaa joanigidaa me jakadi me idewigatema miniokiniwateda Aneotedogoji, codaa miniokiniwateda me idiige. ²⁰Micataga daga yemagawa Cristo madataga nicenaganagate, codaa micataga daaditagalee idewiga. Pida ja idewigatace leegodi me yewigatediloco Cristo. Odaa anodaageji me idewiga maleezejoteloco nigina yolaadi, joanigidaa aneji me idewiga nigijo ane najigotediwa Cristo leegodi me jinakato Niginiaaginiwa, Lionigi Aneotedogoji. Idemaa codaa ja dinajigo me yeletedomi. ²¹Joanigidaagee agica daga jiligoditice Aneotedogoji aneotedomi, ane dagaxa mele. Pida Aneotedogoji nige dibatetege oko leegodi me yotete lajoinaganegeco Moisés, odaa amica jaoga Cristo me yeletedogodom.

Domige me jotetenaga lajoinaganegeco Moisés, odaa Aneotedogoji ja yakadi me godegenaga, ogoa domige me jinakatonaga Goniotagodi?

3 ¹Anakaami Gaalatatedi. Nigida makaamitiwaji ja gadiciagi micataga nigina yetoliwaga! Domigica ane gadoxiitiwaji meotibige me dagadiaagiwagati aneji? Ja jikeenagatagawatiwaji codaa me jaoga me igenaga me jelogotagatagawa anodaagee Jesus Cristo me yeletedeloco nicenaganagate. ²Jemaa manalakitibigetiwaji Aneotedogoji me daga yajigotedagawa Liwigo daga leegodi moteteni lajoinaganegeco Moisés, pida leegodi me iwagati nibodicetedi anele anoditece Cristo. ³Nigida makaamitiwaji gadiciagi micataga oko yetole, igaataga madinojocitini me gadewikitema gela gadewiga me oniteloco loniciwaga Aneotedogoji Liwigo, pida natigide jegemaani mopilitaceloco me gadewiki, mabakeni akamaga gadoniciwaga. ⁴Owidi anixomagateenitedijotiwaji gadawikodico leegodi manakatoni Goniotagodi. Mige nagatooa ijoatawece ijoa gadawikodico? ⁵Nigina Aneotedogoji me yajigotedagawa Liwigo codaa nigina meote godoxicegetedi gadiwigotigitiwaji, domigeote leegodi ina me iwitece lajoinaganegeco Moisés? Anigidaagee. Pida eote inoatawece leegodi majipaatalotiwaji codaa me iwagati nibodicetedi anele anoditece Cristo.

⁶Lotaganagaxi Aneotedogoji yalagata gonelokodi Abraão, nigijo mee, “Abraão nakato Aneotedogoji, joanigidaa leegodi Aneotedogoji me dibatetege Abraão micataga oko ane igenaga.”

⁷Enice leeditibige mowoogotitiwaji, inatawece anonakato Goniotagodi, joanigidiaagidi begewi mida aneetege licogegi Abraão. ⁸Anigicatibige Aneotedogoji daga dibatetege nigina ane daga judeutedi, negee Aneotedogoji lotaganagaxi me dibatetege nigina ane daga judeutedi leegodi monakato. Igaataga digo ane diniditeloco nagadi notaganagaxi, Aneotedogoji yatematite Abraão nibodicetedi anele nigijo jotigide, negeeteta, “Gadibakeni me jibinie inatawece noiigi nigina iigo.”


⁹Aneotedogoji ibinie Abraão leegodi midioka limedi me nakato. Odaa jigidaagigotediogi Aneotedogoji me ibinie inatawece nigina anonakato.

¹⁰Pida nigina oko anodoletibige me dibatetege Aneotedogoji leegodi moyotete lajoinaganegeco Moisés, nigidi oko Aneotedogoji etacidetetece. Igaataga lotaganagaxi Aneotedogoji mee, “Aneotedogoji etacidetetece inatawece oko ane digidioka limedi mowote idiwatawece ane liigenatakanegegi notaganagaxi aneite lajoinaganegeco Moisés.” ¹¹Pida jowoogotaga Aneotedogoji me digica ane dibatetege micataga daga igenaga leegodi me yotete lajoinaganegeco Moisés. Igaataga Aneotedogoji lotaganagaxi mee, “Aneotedogoji dibatetege oko leegodi me nakato, odaa nigijo oko idiokaanaga limedi me yewiga.”

¹²Pida nigina oko anidioka limedi me doletibige me yotete lajoinaganegeco Moisés, nigini oko aliciagi nigijo eledi oko anepaga nakato Goniotagodi. Igaataga nigini oko doletibige midioka limedi me yewiga leegodi me yotete najoinaganegeco, aneeta lotaganagaxi Aneotedogoji, “Nigina oko anidioka limedi meote ane liigenatakanegegi lajoinaganegeco Moisés, nigini oko idioka limedi me yewiga.”

¹³Oko nilaagetedipi leegodi me daga jakataga me jotetenaga ijoatawece lajoinaganegeco Aneotedogoji ane iditedini Moisés. Pida Cristo ja noga moko nilaagetedipi nigijo me dawikode me domegetigodiloikatidi, nigijo nogoyototedeloco nicenaganagate, odaa ja yeletedogodomi. Igaataga mee Aneotedogoji lotaganagaxi, “Nigica oko anoyototi midataga iwogo, Aneotedogoji laagedi.”

¹⁴Jesus Cristo ja yaagadi moko nilaagetedipi eotedibige micotece nigijoa Aneotedogoji lotagate Abraão me ibinie eletidi noiigi ane daga judeutedi.



(Gálatas 3.13)

Leegodi Jesus Cristo me yaagadi mokotawece oko nilaagetedipi, Aneotedogoji ibinie noiigi, codaa eleditace mee me yakadi me najigotedogowa Liwigo nigina ane jinakatonaga Cristo, leegodi akaagida me ligegi.

Lajoinaganegeco Moisés icaagica Aneotedogoji ane ligegi meote

¹⁵Inioxoadipi, jao ane jiciaceketege nigina oko me dinilakidetiwage. Nigina oko me dinilakidetiwage, oiditedini liboonagatedi, oada agaleegica ane yakadi me iigi domigetaga ica ane noga nigijo anodinilakideti. ¹⁶Jigidaagee Aneotedogoji ane ligegitetege Abraão icaagica ica anida aneetege licogegi Abraão me dinilakidetege. Aneotedogoji lotaganagaxi ikee Aneotedogoji me degeetetece eliodi oko anida aneetege licogegi Abraão, pida eetece oniniteci anida aneetege licogegi, ane Cristo. ¹⁷Jemaa me jaote niginoa yotaga ane daga dakaketeda mowoogotitece. Aneotedogoji eote ligegitetege Abraão me dinilakidetege, micataga digica lidigo me dinilakidetiwage. Naga ixomagatedijo 430 nicaagape, oada Moisés ja iditedini lajoinaganegeco, Aneotedogoji ane iigete me iditedini. Pida nigijoa notaga Moisés ane iditedini ayakadi dogoiigi nigijo Aneotedogoji ane dinilakidetege Abraão, otegeaxagaga nogatice nigijo ane ligegiteta. ¹⁸Aneotedogoji meete Abraão me yajigote nigica ane dagaxa mele. Nige leeditibige nigina oko moyotete lajoinaganegeco Moisés modibatege nigica anele, oada ametigica jaoga me dinilakidetege Abraão. Pida ewi Aneotedogoji me yajigote Abraão nigica anele leegodi meote ligegitetege, oada ja dinilakidetege. Idigida aleegotedi lajoinaganegeco Moisés.

¹⁹Enice, igame leegodi Aneotedogoji me iige Moisés me iditedini ijoo liigenatakanegeco? Aneotedogoji iige Moisés me iditedini nigijoo liigenatakanegeco eotedibige me ikee nigica nibeyacaga. Nigijoo niigenatakanegeco oikee nigica ane yemaa Aneotedogoji, negepaagicota Nigijoo anida aneetege licogegi Abraão. Aneotedogoji eote ligegitetege nigijo anida aneetege licogegi Abraão me domaga dibatege nigijo Aneotedogoji ane ligegitetege Abraão me yajigoteta. Nigicoa aanjotedi oyajigota Moisés nigijoo niigenatakanegeco, Moisés micataga daga nigina aneo me ilagatiwage oko. ²⁰Baga jopoogatibige me yaxawa nigijo oko ane libakedi meo nigina oko me dinilakidetiwage nigina me idoa itoataale oko ane leeditibige me dinilakidetiwage. Pida Aneotedogoji bogoniniwatece, oada ayopotedibige eledi oko me yaxawa nigijo negeote ligegitetege Abraão me yajigote anele.

Ica ane leegodi Aneotedogoji me iige Moisés me idi lajoinaganegeco

²¹Domigejinaga inoa lajoinaganegeco Moisés me dogoniwoditema ica ligegitetege Aneotedogoji Abraão? Oniwoditema! Igaataga daga yajigo Aneotedogoji niigenatakanegegi mida loniciwaga meote oko me newigatace, Aneotedogoji taga yakadi nigina oko me igenagatibigiwaji leegodi moyotete liigenatakanegeco. ²²Pida lotaganagaxi Aneotedogoji ikee niginoa nibeyacegoco mida loniciwagateloce inatawece oko, micataga daga liwilogjedipi. Pida

joanigidaa Aneotedogoji me yakadi me yajigotediogi inatawece oko anoyiwagadi nigijo ane ligegi yajigotediogi leegodi monakato Jesus Cristo.

²³Anigicatibige Cristo degenagi meote oko moyakadi monakato, icoa lajoinaganegeco Moisés owote micataga dogoko liwilogojedipi catiwedi niwilogonagaxi negepaa ikee Aneotedogoji anodaagee nigina oko moyakadi monakato. ²⁴Icoa lajoinaganegeco Moisés one micataga nigina ane jilokagateloco ane doweditogoloco, codaa me nikeetogowa naigi anewi eotibige Aneotedogoji me yakadi moko ane igenaga leegodi me jinakatonaga Cristo nigidiaagidi negenagi. ²⁵Natigide nigijoa lajoinaganegeco Moisés ane liciagi nigina ane jilokagateloco agalee doweditogoloco, igaataga Aneotedogoji ja yakadi me godegenaga leegodi me jinakatonaga Cristo.

²⁶Igaataga akaamitawecetiwaji akaami lionigipi Aneotedogoji leegodi manakatoni Jesus Cristo. ²⁷Igaataga nigijo naga adinilegeni me Liboonagadi Cristo, odaa jigikeeni naga gadexcitegetiwaji Cristo, codaa jagadiniigi me gadiciagi digo mijoataga anee. ²⁸Odaa agica iomigigi, okotawece oko diniciamico inoa judeutedi inaagina ane daga judeutedi, ina niotagipi inaagina ane daga niotagipi, inoa goneleegiwadi codaa me iwaalepodi, inatawece diniciamico leegodi moyexogotege Cristo, micataga dogokinitece oko. ²⁹Odaa leegodi mida anenitege Cristo, nigida makaamitiwaji jigida anenitege licogegi Abraão, codaa aagaga yajigotedagawatiwaji Aneotedogoji nigijo ane ligegi me yajigotediogi nigijo anida aneetege licogegi Abraão.

4 ¹Ejema me jelogoditagawatiwaji anodaa diitigilo niginoa yotaga. Micataga nigina nionigi anicota me dibatege inoatawece ane nepilidi nigina naga yeleo eliodi. Nigijo lionigi malee nigaanigi, nigijo eliodi idigota liciagi anigotiogi liotaka, idaagee micota me dibatege ane nepilidi nigicota me goneleegiwa. ²Nigijo eniodi eote oko ane yowie nigaanigi codaa me dowediteloco, codaa aneote eledi oko ane doweditelogo nigica ane nepilidi nigepaagicota nigica noko ane nibikota eliodi nigijo nigaanigi nige dagadiaa leeditibige mini oko ane dowediteloco. ³Nigijo jotigide godiciagi nigijo nigaanigawaanigi. Niginoa niwicidi ane niigenatakanaga aninoa nigina iigo etigodiige micataga dogoko liotagipi. ⁴Pida nigicota nigijo noko ane nibikota Aneotedogoji, odaa ja niwakatee epaa Lionigi. Enitedini me liciagi okanicodaagica nigaanigawaanigi, enitedini me loiigi judeutedi, noiigi anidiwa miditaga icoa lajoinaganegeco Moisés. ⁵Joanigidaagee dinanatibige moko eotedibige me yakadi me yediatedeloco gobeyacegeco, oko ane jotetenaga lajoinaganegeco Moisés, eotedibige Aneotedogoji me yakadi me dibatedogogi micataga moko lionigipi.

⁶Odaa leegodi makaami lionigipi Aneotedogoji, ja niwakateetedibigagaji Liwigo me digeladetiwece catiwedi gadaalegenali. Liwigo anetiwece catiwedi gadaalegena dapaawetibige, meetalo, “Eiodi, Eiodi yemaanigi!” ⁷Odaa leegodi Cristo aneote, agaleegakaami niotagipi, pida akaami nionigipi. Odaa leegodi makaami lionigipi, Aneotedogoji yajigotedagawa inoatawece anele ane yajigotediogi lionaga.

Paulo igecagalege Gaalatatedi

⁸Nigijjo jotigide agicoa mowoogotitewaji Aneotedogoji. Codaa akaamitiwaji liotaka niwicidi abeyacagaga. ⁹Pida natigide jogowoogotitewaji Aneotedogoji. Ogoa domigetaga enegegi igenaga meji Aneotedogoji бага gadowoogotitewaji. Enice, igame leegodi me domegemaanitiwaji mopilitacege makaami liotaka niwicidi abeyacagaga ijaagijoa gadakataga laxokodi ane digica loniciwaga? ¹⁰Motetenitiwaji noko eliodi, codaa me nokododi me gela epenai, codaa inoa nalokeco ane daga nigotedini, codaa me niginoa nicaagape inoa gadakataga laxokodi anoiigetagawa moteteni. ¹¹Eliodi me yaaditibigagajitiwaji. Nalagatigi daga atooa ijoatawece nigijjo ibakedi ane jaote me gadaxawanitiwaji.

¹²Inioxadipi, jipokotagawatiwaji manowikitiwa digo aneji me idewiga. Igaataga ja idiniciaceeketagajitiwaji ane daga akaamita judeutedi. Codaa nigida makaamitiwaji agica dagawii ane beyagitomi. ¹³Owoogotitiwaji nigijjo maleekoka idinojogotini me jatematitedibece nibodicetedi anele anoditece Cristo, idiaagejote makaamitagajitiwaji leegodi me jeelotika. ¹⁴Pida agakatitiwaji daaditigica iniwaló, pida abaatigi, idaagee mida yeelotagi ane dakaketagadomi. Odaa jagabaatigi micataga degee niaanjo Aneotedogoji, codaa mabaatigi micataga dagabaatege Jesus Cristo. ¹⁵Codaa eliodi maniniitibecitiwaji. Natigide, igaamenitiwaji ina me dagadiaaganiniitibeci ee leegodi? Jakadi meji naga gadigomitiwaji nigijjo jotigide manogaa akamaga gagecooge manajicitiwa, daga leeditibige midaagemiitiwa madaxawani. ¹⁶Natigide, manigicaa jao me ee gadaxakawa leegodi me jelogoditagawatiwaji anewi?

¹⁷Nigijjo anetigadiigaxinitecetiwaji ane degewi, nigijjo oko dinoniciwagaditibigiwaji mowote me gadokaagetedipi, pida agidigida dogowote aneletagadomi. Idokoyemaa me iwitecetiwaji, odaa agaleeganiwitici. ¹⁸Pida ele me idinoniciwagadi me jaote makaami yokaagetedipi igaataga jemaa me jao aneletagadomi. Idioka limedi mewi me idinoniciwagadi digoina aginokina me ee makaamitagajitiwaji. ¹⁹Akaami ionigipi yemaanigipi! Joanigidaa leegodi meliodi me yaaditibigagaji, ja jawikodetace, macataga nagana godiodo naga dawikodetace me ilee le me dinigaje. Jawikode nigepaagicootatiwaji made enitiwaji digo mijoataga Cristo anodaageeteda. ²⁰Eliodi me domaga jemaa me idejo makaamitatiwaji nagani lakata daganagawini eledi anejigotagawa me gadotaganegenitiniwace, me daga jiojotagadici. Igaataga eliodi me yaaditibigagajitiwaji, codaa ajowoogodi nigica anejigotagawatiwaji me gadaxawani.

Ica anociaceeketege Agar ajaa Sara

²¹Akaamitiwaji anemaani moteteni lajoinaganegeco Moisés, analogotitiwa! Agica majipaatiwaji aneeta Aneotedogoji lotaganagaxi anidiwa

najoinaganegeco? Ejitibige ina nogowoogotitiwaji. ²²Nagajo notaganagaxi ikee Abraão mijoa iniwataale lionaga. Onica lionigitege aca iwaalo ane liboonagadi Agar ane liota nagajo бага lodawa. Ica eledi bogone lionigitege nagajo бага lodawa ane daga niota, ane liboonagadi Sara. ²³Nigijo lionigitege nagajo iwaalo ane niota enitini me liciagi okanicodaagica nigaanigi. Pida nigica lionigitege nagajo ane daga niota joaniginiaagini ane enitini leegodi Aneotedogoji me ligegi micota menitini, enitini leegodi Aneotedogoji yajigoteta loniciwaga nagajo eliodo idaagida naga dagaxa mopake. ²⁴Nigida natematigo ida ane niitigi. Nigidi iniwataale iwaalepodi oiciaceeketege nigicoa itoataale anigote Aneotedogoji me dinilakidetetege oko. Agar liciagi nigijo oxiiigodi anee Aneotedogoji me dinilakidetetege oko, aneote digoida maditaga wetiga anodita me Sinai, nipodigi Arábia. Nigijo lionigi Agar micataga niotagi. Joanigidaagee nigina oko ane yotete nigijo oxiiigodi anee modinilakidetetege Aneotedogoji, nigidi oko micataga daga liotagipi nigijoa niigenatakanegeco. ²⁵Enice nagajo Agar niitigi me liciagi nigica oxiiigodi anee nigina oko modinilakidetetege Aneotedogoji, aneote Aneotedogoji digoida maditaga wetiga anodita Sinai. Agar eledi oiciaceeketege nigotaga Jerusalém, igaataga nigijo nigeladimigipitigi nagani nigotaga oyotete nigica oxiiigodi anee Aneotedogoji me dinilakidetetege oko, oada nigidi nigeladimigipi oiciaceeketege daga liotagipi lajoinaganegeco Moisés, igaataga nigijoa lajoinaganegeco oiige lewiga. ²⁶Pida Sara ane daga niota, bogoiaceeketege nigida gela nimawenegegi Aneotedogoji me dinilakidetetege oko, codaa me liciagi aca nigotaga digoida ditibigimedi, aca gela Jerusalém. Odaa okotawece anida anejinagatege Cristo jogokomogoko nigica nigeladimigipitigi nagaca gela nigotaga, oada agodiciagi niotagipi, igaataga agetigodiige lajoinaganegeco Moisés. ²⁷Igaataga lotaganagaxi Aneotedogoji mee,

“Akaami,

iwaalo ane digicata manigajee,

aniniitibeci!

Codaa akaami,

ane digicata mileeni gadionigi,

apaawe maniniitibeci!

Igaataga nagani iwaalo ane dagadiaagoniwita icota mepogowidi lionaga caticedi nagajo iwaalo anepaga niwita nigijo lodawa.”

²⁸Inioxadipi, oko lionigipi Aneotedogoji leegodi Aneotedogoji meote ligegitedogogi, digo mijotaga Isaque ane lionigi Sara menitini leegodi Aneotedogoji meote ligegitetege Abraão micota menitini. ²⁹Nigijo jotigide nigijo lionigi Agar anenitini me liciagi okanicodaagica nigaanigi ja iatetibeci nigijo lionigi Sara anenitini leegodi loniciwaga Liwigo Aneotedogoji. Joanigidaagejinaga nigina natigide. ³⁰Pida Aneotedogoji lotaganagaxi ikee nigica Aneotedogoji ane iigeteta Abraão, nigijo meete, “Amonyaa mopi nagani iwaalo niota, iniaagini nigini lionigi! Igaataga nigina lionigi nagana iwaalo niota ayakadi daga yawalace ane nepilidi eliodi daga niwaigawa

nigijo lionigi nagani iwaalo ane daga niota.” ³¹Enice, inioxoadipi, agodiciagi lionigipi nagajo niota, pida godiciagi lionigipi nagajo iwaalo ane daga niota.

Oko ane jinakatonaga Cristo agodiciagi nigina oko niotagipi

5 ¹Cristo eote me dagadiaa jopoogatibige me jotetenaga lajoinaganegeco Moisés me jaogatibige Aneotedogoji me yakadi moko ane igenaga. Agaleegoko niotagipi. Enice atiteteloco gatiwagatakanegegi, codaa jinigiwitece liigaxinaganegeco nigijo oko anodoletibige mowotace makaami niotagipi, codaa mowote me iwitece nigijoa najoinaganegeco.

²Digawinitiwaji! Ee Paulo, ejitagawatiwaji. Nigakagiti gadolaaditiwaji ane lakatigi noiigi judeutedi leegodi moyotete lajoinaganegeco Moisés, odaa nigijo Cristo aneotedagadomi amica jaogate. ³Jemaatace me gadajoinitiwaji. Nigijo goneleegiwa ane ika moyakagidi lolaadi ane lakatigi judeutedi moyotete lajoinaganegeco Moisés, leeditibige midioka limedi me yotete idiwatawece najoinaganegeco, odaa ayakadi daga dinetema otigiditece. ⁴Akaamitiwaji anoleetibige Aneotedogoji me dibatedagagi micataga oko ane igenaga leegodi moteteni lajoinaganegeco Moisés, nigida makaamitiwaji jagawalacetege Cristo. Odaa Aneotedogoji agalee yakadi meotedagadomitiwaji icoatawece nigicoa anele ane domegeotedagadomi. ⁵Pida okomogoko jowoogotaga codaa ajawienatakanaga Aneotedogoji me yakadi moko oko ane igenaga leegodi me jinakatonaga Cristo. Odaa Liwigo Aneotedogoji jiginiagee me jowoogotaga, codaa me inibeonagatege Aneotedogoji micota me yakadi moko oko ane igenaga. ⁶Leegodi nigina me godexogotege Jesus Cristo, aibeyacagadi domige jakagitaga godolaadi ane lakatigi judeutedi, ogoa domige ajakagitaga. Pida ida anegegi jaoga nigina me idinemaanagatiwage leegodi me jinakatonaga Cristo.

⁷Ja domaga gadilakiiteticetiwaji micataga nalokodegecajo baanaga domaga dinigaanye. Amijio ica aneo mikanitiwaji me iwagati ijoa niigaxinaganegeco anewi? ⁸Nigijo oko aneo mikani me iwagati nigijoa niigaxinaganegeco, agAneotedogoji. Pida Aneotedogoji baaniginiaa aneniditedagawa me iwitece. ⁹Eliodi moditibece, “Onatecigini labookojegi eo minitawece leyeema ili.” (Odaa oniniteci oko yakadi me gadibeyacagati akaamitawecetiwaji.) ¹⁰Pida leegodi me godexogotege Goniotagodi, gadinakatonitiwaji me dagawii eledi gadowoogo. Pida nigijo oko ane gadigiwocitiwaji, Aneotedogoji iloikatidi, agica meote daga yowoogodi domige gonegegi, ogoa domige agonegegi.

¹¹Inioxoadipi, modi malee jiigaxinagatece ica malee leeditibige niginoa goneleegiwadi moyakagidi lolaadi ane lakatigi judeutedi modocagatalo Aneotedogoji. Nigidaageji me jiigaxinaga, igrage leegodi inaa maleegetidiatetibece? Nigaleegidaageji me jiigaxinaga, nigina mejitece niigaxinaganegegi aneetece lemegegi Cristo madataga nicenaganagate, agotigica ane yelatema yatematigo. ¹²Domaga jemaatibige niginoa goneleegiwadi anetigadigiwocitiwaji, anetigadiigeni makagiti gadolaadi,

domaga jemaa mowote caticedi nigica ane liigenatakanegegi mawii, mepaa dinoga me dagadiaagica lionigi.

¹³Nigida makaamitiwaji, inioxadipi, Aneotedogoji jegeniditedagawa me daga gadiciagi niotagipi anodioteci lajoinaganegeco Moisés. Pida jinagaleetibige daga leegodi me daga leeditibige moteteni lajoinaganegeco Moisés mocaganitalo Aneotedogoji, oditaga natigide jagakatitiwaji mawii okanicodaagica ane yemaa gadolaadi mawii. Pida adinaxawanitiwageti waji leegodi madinemaanitiwage.

¹⁴Igaataga nigida makaamitiwaji oteteni inoatawece niginoa ane iigetedagawa Aneotedogoji, nigoteteni nigijo liigenatakanegegi anee, “Emaanitiwaji okanicodaagica oko anakapetege digo aneni makamaga adinemaani.” ¹⁵Pida adinowetitiwaji, igaataga nigawii micoataga eijedi ane diojo ane nowacaganaga anepaa dinanacilotiditiwage, doidetibige makamaga adinaagatiwaji.

**Icoa okomaga godemaanaga, icaagicoa ane
yemaa Liwigo Aneotedogoji me jaogate**

¹⁶Digawini ane jemaa me igegitagawa. Ikanitiwaji Aneotedogoji Liwigo me gadajacagatitema inoatawece ane oeni, amanagawini agawii ane yemaa gadolaadi mawii. ¹⁷Igaataga nigica ane yemaa godolaadi lakapetegi nigica anagaga yemaa Aneotedogoji Liwigo, codaa nigica ane yemaa Aneotedogoji Liwigo aagaga lakapetegi nigina ane yemaa godolaadi. Odaa nigidi iniwataale ailagatiwage, micataga daga dinaxakawepodi catiwedi godaalegena.

Joanigidaa leegodi me daga jakataga me jaoga nigina anokomaga jemaanaga. ¹⁸Pida Liwigo Aneotedogoji nige yajacagadi niginoa gadoenataka, odaa nigida makaamitiwaji agaleegakaami liotagipi lajoinaganegeco Moisés.

¹⁹Pida ele me jowoogotaga nigicoa anepaa lemaanaga godolaadi. Nigina metigodiige niginoa anokomaga godemaanaga me jaoga, owo oko me nigopelogege okanicodaagica eledi oko, owote loenatagi ane beyagi, codaa agoyakadi modinajacagaditema niginoa lakataga. ²⁰Niginoa lidagataka godolaadi nige iige oko, nigini oko dogetetalo niwicidi noenataka, codaa ibake noxikonegegi. Odaa nigina oko ja dinaxakawamigi, codaa me nidelaga. Nelokojogonaga codaa atooa me neligideega, codaa oyemaa mepoka oyakadi ganigidi. Dinixipeticoace lapotibece me dakapeti wage, codaa idioka limedi modoletibige modioteci okanicodaagica eledi niigaxinaganegegi. ²¹Dinoceti wage, codaa gonematagododi. Acipagaga, codaa dagaxa me lemaanigi nalokegi. Owote eletidi loenataka ane beyagi liciaco niginoa baanogowote. Jigijo mejitagawatiwaji, pida ejitacagawa Aneotedogoji me daga iigeteda laalegenali nigina oko anidioka limedi mowo ane beyagi, codaa agoyakadi me ide miniwataga Aneotedogoji.

²²Pida nigina Aneotedogoji Liwigo nige godajacagadi, odaa eo me idinemaanagatiwage, codaa godinitibece leegodi me jowoogotaga Aneotedogoji, codaa mele godaalegenali. Idinatiigata eledi oko, codaa jiwikodenaga eledi oko, codaa me jaoga aneletema eledi oko. Codaa nigina oko oyakadi metigodinakato. ²³Liwigo Aneotedogoji eo moko okaagaga nigina

me jilenagatibigo eledi oko, codaa eo me idinajacagatagatema ane lidagataka godolaadi. Agica niigenatakanegegi ane dakapetege Aneotedogoji Liwigo aneo catiwedi oko laalegena. ²⁴Odaa nigina ane nepilidi Cristo, agaleegoika lolaadi me iige mowo anepaa yemaa. Pida ja micataga daga yeleo lolaadi awatege Cristo nigijo naga yeleo madataga nicenaganagate, odaa jigidaa niginoa lidagataka ane beyagi lolaadi, inaaginoa lowooko ane beyagi, ja ma. ²⁵Leegodi Liwigo Aneotedogoji najigotogowa gela godewiga. Enice jikanagatece mepaa godajacagaditema inoatawece niginoa ane jaogate. ²⁶Odaa aidinanenagatibece, otegeaagaga jiweenigenatakanaga, otegeaagaga godelokojogo eledi oko.

Adinaxawanitiwagetiwaji

6 ¹Inioxoadipi, nigica ananati ganioxa meote ane beyagi, leeditibige akaamitiwaji, anepaga gadajacagati Aneotedogoji Liwigo, moxoki nigini oko awii me dopitalo Goniotagodi. Pida nigoxoki awii makaami okaagegipi nigina me oxokojogoni, pida adinowetitiwaji adagawii liciagi meo ane beyagi. ²Adinaxawanitiwaji nigina mini oko anida ane iwaagaditema, ane micataga digidi loyagagi ane iwaagadi. Odaa nigidaageni jogoteteni liigenatakanegegi Cristo ane najigotedogowa me godiige me leeditibige me idinemaanagatiwage. ³Nigica oko ane diletibige daga dagaxa me gonegegi, nigini epaa dininaale. ⁴Igaataga oninitecibeci oko leeditibige me iwi nigica ane loenatagi. Nigele nigica aneo, enice yakadi me ninitibece leegodi loenatagi, idigida aleegodi daga diniciaceeketege eledi oko, oditaga yakadi menegegi ele. ⁵Igaataga oninitecibeci oko leeditibige meo nigica Aneotedogoji ane iigete meo.

⁶Nigijo ane diniigaxitece niigaxinaganegeco anoditece gotiwagatakanegegi, leeditibige nigijo oko me niwaigawatece icoa ane nepilidi nigijo niigaxinogodi.

⁷Jinaga adininaalenitiwaji! Agica ane yakadi me yame Aneotedogoji. Nigina oko icota me nopilagaditio nigica aneyatini. ⁸Odaa jigidaagee nige jaoga nigica anepaa yemaa godolaadi, idioka limedi me godeleo, codaa leegitalo Aneotedogoji me jotonagatedice. Pida nige jaoga ane yemaa Aneotedogoji Liwigo, odaa idioka limedi me godewiga miniwataga Aneotedogoji. ⁹Enice jinaga inigaaxaga me jaoga anele. Igaataga nigicota limedi, odaa ja inopilagatagatio anele leegodi nigijo anejanagatini. ¹⁰Enice nigina me jakataga me jaoga nigica anele, leeditibige me jaoga aneletema inatawece oko, pida odoejedipi me jaogatema nigina oko ane loiigi Goniotagodi.

Paulo yecoaditibige codaa me najoitiniwace gonioxoadipi

¹¹Jaganatitewaji niginoa idiko nelecoli ane emaga jidi nigina natigide me jikee negemaga jidi nagadi iwakate notaganagaxi. ¹²Nigijo ane lemaanigi me dinikeenaganege codaa me diniwenigide leegodi me dinakagiditibigiwaji ane



(Gálatas 6.7-9)

lakatigi judeutedi, joanigidiaa domaga etigadiedegenitiwaji madinakagiti digo mijotaga. Dinakagiditibigiwaji idokowotibige niginoa eletidi judeutedi me dagadiaagoiatetibece leegodi godatematigo anoditece lemegegi Cristo madataga nicenaganagate. ¹³Igaataga nigidi ane dinakagiditibigiwaji ane lakatigi judeutedi, idiaagidi nigidi oko agidioka limedi moyotete lajoinaganegeco Moisés. Pida oyemaa madinakagitiwaji owotibige moyakadi me dinabaketibece makaami eledi adi nibikotaxete gadolaadi. ¹⁴Pida emegeee бага idinanetibece leegodi lemegegi Goniotagodi Jesus Cristo madataga nicenaganagate. Leegodi lemegegi, odaa micataga daga yemagawa madataga nicenaganagate, odaa jigidaa naga inoatawece aninoa digoina iigo agaleegica jaote, codaa agaleegowo me jogowikomata. ¹⁵Igaataga nigina me godexogotege Jesus Cristo, aibeyacagadi nigina goneleegiwa domige dinakagidi ane lakatigi judeutedi, ogoa, domige adinakagidi. Pida anenegegi ida ane jaoga, Nigina Aneotedogoji meote oko me gela oko, mida gela lewiga. ¹⁶Jemaa Aneotedogoji meote mele laalegenali, codaa me iwikode, inatawece nigina anodioteci niginoa niigaxinaganegeco anele, codaa minatawece judeutedi anonakato Goniotagodi, odaa begewi me loiigi Israel.

¹⁷Nigina natigide agaleegica ane idigiwogo, igaataga inoa inepitagajetedi nolee yolaadi leegodi nigijoa yawikodico ane ikee me ee nebi Goniotagodi Jesus.

¹⁸Akaami inioxoadipi, inibeotege Goniotagodi Jesus Cristo meote inoatawece aneletagadomitiwaji. Odaa jigidaagee. (Amém).